

Claustra, ils 24 da settember 2025

Madrisa Solar è l'emprim implant alpin d'energia solara che producescha electricitad

Quests dis ha Madrisa Solar cumenzà ad alimentar la rait cun electricitad - sco emprim implant alpin d'energia solara en Svizra. Quest cumenzament reussì è in term decisiv entaifer l'offensiva solara naziunala Solarexpress che vul promover l'electricitad d'enviern urgentamain necessaria. Enfin la fin dal 2027 duai l'implant en il Partenz esser en funcziun dal tuttafatg.

La patruna da l'implant alpin d'energia solara sur Claustra Vitg è la Madrisa Solar AG. A la societad sa participeschan Repower, l'EKZ e la vischnanca da Claustra cun mintgamai in terz. Cun la planisaziun e la realisaziun da Madrisa Solar è vegnidas incumbensadas per gronda part interpresas regiunalas.

Tenor las directivas dal Solarexpress duai almain in dieschavel da la producziun annuala prevista esser colliada cun la rait d'electricitad enfin la fin da l'onn. Las lavurs da construcziun a Madrisa èn avanzadas uschè bain dapi l'emprima badigliada ils 4 da zercladur che la directiva è gia vegnida surpassada: Var 15 pertschient da l'implant furnescha actualmain electricitad a la rait. Concretamain han ins francà questa stad gia 500 maisas solaras en il fund e montà 3000 moduls solars bifacials. Uschia è Madrisa Solar l'emprim implant alpin d'energia solara ch'è vegnì collià cun la rait en il rom da l'offensiva solara.

L'electricitad producida a Madrisa vegn utilisada da l'EKZ e gist er al lieu per far ir las pendicularas Claustra-Madrisa. En cumbinaziun cun ils agens implants fotovoltaics da las pendicularas èsi grazia a la part da Madrisa Solar pussaivel da producir gia tanta energia sco ch'i dovra la stagion d'enviern vegninta per far ir las pendicularas.

Madrisa Solar sa chatta sin var 2000 meters sur mar ed è concepì consequentamain per producir electricitad l'enviern. En il stadi final vegn l'implant d'energia solara a producir radund 17 uras gigawatt ad onn, da quellas passa 40 % durant il mez onn d'enviern, cura che la Svizra è spezialmain dependenta da funtaunas d'energia renovablas fidadas. L'implant solar è integrà bain en la cuntrada e nizzegia a moda raschunaivla il character dal territori da skis.

Per tut las personas interessadas organisescha la Madrisa Solar AG ils 4 d'october 2025 in di dal plazzal avert. Las visitadras ed ils visitaders survegnan invistas interessantas d'emprim maun en quest project alpin da pionier.

Dapli infurmaziuns davart il di dal plazzal avert e davart il project Madrisa Solar datti sin las paginas-web da [Repower](#) e da l'[EKZ](#).

Contacts

Repower AG	EKZ
post da medias	post da medias
t +41 81 423 77 00	t +41 58 359 52 55
medien@repower.com	medienstelle@ekz.ch

Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Küblis, Landquart, Turitg e Milaun. Repower è activa lung l'entira chadaina da valorisaziun da l'electricitad, da la produenziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.

EKZ

Las Ovas electricas dal chantun da Turitg EKZ èn ina da las furnituras d'energia las pli grondas da la Svizra e provedan var in milliun umans a moda fidada cun forza electrica regenerabla per 100 pertschient. Las var 1570 collavuraturas e collavuratur da la gruppa EKZ s'engaschan per in avegnir energetic persistent: cun amplifitgar l'energia eolica, idraulica e solara e cun porscher tecnologias smartas sco pussaivladads da chargiar per l'electromobilitad. Las EKZ planiseschan, construeschan e mantegnan ina rait electrica da prest 17 000 kilometers lunghezza ch'è disponibla surproporziunalmain cun 99,998 pertschient. Da la clientella da las EKZ fan part personas privatas, interpresas ed autras furnituras d'energia svizras. Sco ina da las interpresas d'emprendissadi las pli grondas en il chantun da Turitg scoleschan las EKZ 155 spezialistas e spezialists en diesch professiuns cun emprendissadi.